
DÉZIÈM CHAPIT
**Mouin kouè nan Jézu-Kri,
sèl Pitit Bondié-a**

ATIK 3
*Jézu-Kri, « sé pa pouvoua Éspri-Sin-an
kò li vîn fèt nan vant Mari ki Vièj »*

PARAGRAF 3. *Mistè lavi Kris-la*

512 Parapò a lavi Kris-la, Sinbòl lafoua-a palé sèlman osijè mistè Inkarna-
sion-an (konsépsion épi nésans) épi Pak-la (soufrans, krisifiksion, lanmò,
antèman, désant nan lanfè-yo, rézireksion épi asansion). Li pa di anyin
1163 éksplisitman osijè mistè lavi kaché épi piblik Jézu-a ; min atik lafoua-a ki
rapòté Inkarnasion Jézu ak Pak-la, yo kléré *tout* lavi Kris-la sou tè-a.
« Tou sa Jézu té kòmansé fè ak sa-l té aprann, jous nan jou, lè-l té [...] monté » (Ac 1, 1-2) *sé anba limiè mistè Nésans-la épi Pak-la pou yo konsidéré yo.*

513 Katéchèz-la, dapré sikonstans-yo, ap déplouayé tout richès mistè Jézu
426, 561 yo. Isit-la sa sifi pou indiké kèk éléman ki komin pou tout mistè lavi Kris-
la (I), pou déligné après sa prinsipal mistè lavi kaché-a (II) épi piblik (III)
Jézu-a.

I. Tout lavi Kris-la sé mistè

514 Anpil bagay ki intérése kiriozité moun parapò a Jézu, yo pa nan
Évanjil-yo. Osijè lavi-l nan Nazarèt yo prèské pa di anyin, épitou yon gran
pati nan lavi piblik li-a yo pa rakonté-l (cf. Jn 20, 30). Sa-k té ékri nan
Évanjil-yo, yo rakonté-l « pou nou kouè Jézu sé Kris Pitit Bondié, épi pou
antan nou kouè-a, nou gin lavi o non-l » (Jn 20, 31).

515 Sé moun-yo ki té pami premié sa-k té gin lafoua-a ki té ékri Évanjil-yo
126 (cf. Mc 1, 1 ; Jn 21, 24) épi ki té vlé fè lòt-yo patisipé ladan-l. Kòm yo té
konnin nan lafoua kilès Jézu yé, yo té kapab ouè épi fè ouè tras mistè li-a
nan tout lavi-l sou tè-a. Dépi nan toual ki vlopé-l nan Nésans li-a (cf. Lc 2,
7) jous nan vinèg Soufrans-la (cf. Mt 27, 48) épi dra Rézireksion-l nan (cf.

Jn 20, 7), tout bagay nan lavi Jézu sé sign mistè li-a. Palintèmediè aksion-l yo, palintèmediè mirak li-yo, palintèmediè paròl li-yo, yo révéle « nan li-minm » tout plénitud « sa Bondié-a » abité nan li « dapré kò-a » (Col 2, 9). Konsa, sa-l yé kòm moun parèt tankou « sakréman », sètadi, sign épi instriman divinité-l épi salu li-minm li ofri-a : sa yo té kapab ouè nan lavi-l sou tè-a, t-ap kondui nan mistè invizib sa-l yé kòm Pitit Bondié-a épi nan mision rédanmsion-l nan.

Lign ki komin pou mistè Jézu-yo

- 516
65
2708
517
606, 1115
518
- Tout lavi Jézu sé *Révélation* Papa-a : paròl li-yo épi aksion-l yo, silans-yo ak soufrans-yo, fason-l yé épi fason-l palé. Jézu kapab di : « Moun ki ouè-m, li ouè Papa-a tou » (Jn 14, 9) ; épi Papa-a : « Sa-a sé Pitit mouin-an, sa-m rinmin-an : kouté-l » (Lc 9, 35). Lè Granmèt nou-an té tounin moun pou-l fè volonté Papa-a (cf. He 10, 5-7), minm lign ki pi piti nan mistè-l yo manifesté charité Bondié-a pou nou (1 Jn 4, 9).
- Tout lavi Kris-la sé yon mistè *Rédanmsion*. Rédanmsion-an vîn jouinn nou an premié palintèmediè san ki koulé sou koua-a (cf. Ep 1, 7 ; Col 1, 13-14 ; 1 P 1, 18-19), min mistè sa-a travay nan tout lavi Kris-la : déja nan Inkarnasion-l nan, koté antan-l desidé vîn pòv, li anrichi nou ak kondision pòv li-a (cf. 2 Co 8, 9) ; nan lavi kaché-l la koté antan-l soumèt (cf. Lc 2, 51), li réparé dezobéyisans nou-an ; nan paròl li-a ki purifié (pròpté) sa-k tandé-l yo (cf. Jn 15, 3) ; nan gérizon-l yo ak égzòsism li-yo koté « li-minm minm li té pran féblès nou-yo, li té poté maladi nou-yo » (Mt 8, 17 ; cf. Is 53, 4) ; nan Réziréksion-l nan, koté li jistifié nou (cf. Rm 4, 25).
- Tout lavi Kris-la sé yon mistè *Rékonsidéré tout bagay apati tèt-la*. Kèlkésoua sa Jézu té fè, té di épi té souffri, té gin kòm finalité pou rétabli moun-nan ki tonbé-a nan premié vokasion-l nan :

« Lè li té inkarné épi li tounin moun, li réprann dépi nan tèt nan li-minm longé ékspozé istoua moun-yo, antan-l ba nou sové li sové nou-an an rézimé, pou sa nou té pèdi nan Adan-an, sètadi égzisté dapré pòtré ak résanblans Bondié-a, nou vîn résévoua-l nan Kris Jézu » (S. Irénée, hæc. 3, 18, 1). « Dayè sé poua li pasé nan tout laj lavi-a, antan-l rétounin bay yo tout sa-k pou minnin al nan kominion ak Bondié-a » (ibid. 3, 18, 7 ; cf. 2, 22, 4).

Kominion-nou avèk mistè Jézu-yo

- 519
793, 602
1085
- Tout richès Kris-la sé tout moun yo bay-yo épi yo fè byin pou tout moun (RH 11). Kris-la pa-t minnin lavi-l pou pròp tèt pa-l, min *pou nou*, dépi Inkarnasion-an « poutèt tout moun, pou-l vîn sové nou » (DS 150) jous nan lanmò li-a « pou péché nou-yo » (1 Co 15, 3) épi Réziréksion li-an « pou nou vîn kòrèk-la », « pou jistikasion nou-an » (Rm 4, 25). Jous koulié-a sé li-minm ki avoka-nou « bò kot Papa-a » (1 Jn 2, 1), « antan-l vivan tout tan pou-l priyé pou nou » (He 7, 25). Ak tout sa-l té viv épi li té souffri nan lavi-a poutèt nou yon sèl foua pou tout tan, li rété prézan pou tout tan « dévan fas Bondié pou nou » (He 9, 24).

520 Nan tout lavi-l, Jézu prezanté-l kòm *modèl-nou* (cf. Rm 15, 5 ; Ph 2,
459, 359 5) : sé li ki « moun ki apouin nèt-la » (homme parfait) (GS 38) k-ap invité
2607 nou pou nou vîn tounin disp-li épi pou nou suiv li : ak rabèsman-l nan, li
ba nou yon égzanp pou nou imité (cf. Jn 13, 15), ak priyè-l la, li ralé nou
nan priyè-a (cf. Lc 11, 1), ak kondision pòv li-a, li rélé nou pou nou
résévoua libréman mank mouayin-an ak pèsékision-yo (cf. Mt 5, 11-12).

521 Tout sa Kris-la té viv li fè-l pou *nou kapab minnin lavi-nou nan li* épi
2715 pou-l *kapab minnin lavi-l nan nou*. « Pitit Bondié-a, palintèmediè
1391 Inkarnasion-l nan, té vîn fè youn nan yon fason ak tout moun » (GS 22, §
2). Yo rélé nou pou nou fè youn avè-l ; kòm manb nan kò li-a, li fè youn
fason pou nou kominié nan sa-l té viv nan chè li-a pou nou épi kòm
modèl-nou :

« Nou doué kontinué épi akonpli nan nou kondision ak mistè Jézu-yo épitou
nou doué priyé-l souvan [...] pou-l fîn réalisé-l épi akonpli-l nan nou ak nan
tout l'Égliz li-a. [...] Paské Pitit Bondié-a gin nan nanm-li pou-l kominiké
épi éljaji nan yon sètin fason épi kontinué mistè-l yo nan nou ak nan tout
l'Égliz li-a, [...] soua nan lagras-yo li établi pou-l ba nou-yo, soua nan rézilta
li vlé réalisé nan nou palintèmediè minm mistè sa-yo. Sé nan fason sa-a li
vlé réalisé yo nan nou » (S. Jean Eudes, *Le royaume de Jésus*, 3, 4 : *Oeuvres
complètes*, v. 1 [Vannes 1905] p. 310-311).

II. Mistè anfans ak lavi kaché Jézu-a

Préparasion-yo

522 Avènman Pitit Bondié-a sou tè-a sé yon évènman ki tèlman gran
711, 762 dépasé mézi, Bondié té vlé préparé-l pandan sièk tan. Rit ak sakrifis, figi
ak sinbòl « Prèmié Tèstaman-an » (cf. He 9, 15), li fè yo tout vîn réyini
ansanm nan Kris-la : li anonsé-l nan bouch Profèt-yo ki té vîn youn apré
lòt nan Israèl. Dayè li révéyé nan kè moun nasion-yo yon atant voualé
Avènman li-an.

523 *Sin Jan Batis* sé sa k-ap kouri imédiatman dévan (précurseur)
712, 720 Granmèt-la (cf. Ac 13, 24) yo voyé-l pou-l préparé rout-la (cf. Mt 3, 3). Li
minm, « profèt Sa-a ki anro nèt-la » (Lc 1, 76), li dépasé tout Profèt-yo
(cf. Lc 7, 26), sé li ki dènié-a nan yo (cf. Mt 11,13), li inogiré Évanjil-la
(cf. Ac 1, 22 ; Lc 16, 16) ; li salué Avènman Kris-la dépi nan vant
manman-l (cf. Lc 1, 41) épi li gin kontantman poutèt li sé « zanmi mésié
k-ap marié-a » (Jn 3, 29) ki indiké-l kòm « Mouton Bondié-a, ki ouété
péché tè-a » (Jn 1, 29). Antan-l vini anvan Jézu « nan éspri ak pouvoua
Éli » (Lc 1, 17), li rann li témouagnaj ak prédikasion-l, ak batèm
konvèsion-an épi finalman ak mati li sibi-a (cf. Mc 6, 17-29).

524 Chak ané, antan l-ap sélébré *litiji Avan-an (Avènman-an)*, l'Égliz-la
aktualizé fason sa-a pou tann Mési-a (li fè-l vîn prézan antan-l réviv li) :

1171 antan yo kominié nan préparasion ki té long pou prémié Avènman Sovè-a, fidèl-yo rénouvélé dézi byin cho pou dézièm Avènman-an (cf. Ap 22, 17). Palintèmediè sélébrasion nésans ak mati Prékursè-a, l'Égliz-la fè youn ak sa-l té anvè-a : « Li minm sé pou-l grandi, mouin minm minm sé pou-m vîn pi piti » (Jn 3, 30).

Mistè Nésans Granmèt-la (Noël)

525 Jézu té fèt nan yon koté yo séré pay pou bèt manjé, nan yon fanmi ki té pòv (cf. Lc 2, 6-7) ; sé gadyin mouton tou sinp ki té prémié témouin évenman-an. Nan povreté sa-a gloua sièl-la manifesté (cf. Lc 2, 8-20).
437 L'Égliz-la pa sispann chanté gloua nuit sa-a :
2443

« Jodi-a Vièj-la anfanté Sa-a ki anlè tout sa-k égzisté,
épi tè-a ofri yon gròt bay sa yo pa kapab rivé koté-l la.
Anj-yo ak gadyin mouton-yo ba li gloua,
maj-yo ak étoual-la fè rout ansanm :
paské li pran nésans pou nou
Ti Bébé, Bondié dépi anvan tout tan-an ! »
(Kontakion de Romanos le Mélode)

526 « Vîn tounin tankou ti moun piti-yo » parapò a Bondié sé kondision pou antré nan Rouayòm-nan (cf. Mt 18, 3-4) ; pou sa sé pou bésé tèt-ou (cf. Mt 23, 12), vîn toupiti ; plis toujou, li nésésè pou « fèt ankò » (Jn 3, 7), « fèt sot nan Bondié » (Jn 1, 13) pou « vîn tounin pitit Bondié » (Jn 1, 12). Mistè Noël-la (Nésans Granmèt-la) akonpli nan nou lè « Kris-la fòmé nan nou » (Ga 4, 19). Noël sé mistè « mèvèy échanj-la » :

« Ala li ékstraòdinè sa nou troké-a ! Kréatè ras moun-nan antan li pran yon kò animé, li té aksépté pran nésans nan Vièj-la ; épi antan sé san sémans li soti kòm moun, li té fè nou kado divinité-l la » (LH, antienne de l'octave de Noël).
460

Mistè anfans Jézu

527 *Sikonsizion* Jézu-a, uit jou apré Nésans li-a (cf. Lc 2, 21), sé sign li antré fè pati désandans Abraam-nan, nan pèp Alians-la, li soumèt anba Laloua-a (cf. Ga 4, 4), li destiné pou kult Israèl-la, l-ap patisipé ladan-l pandan tout lavi-l. Sign sa-a anonsé davans « sikonsizion Kris-la » ki Batèm-nan (cf. Col 2, 11-13).
580
1214

528 *Épifani-an* sé manifestasion Jézu kòm Mési Israèl-la, Pitit Bondié épi Sovè tè-a. Ansanm avèk batèm Jézu nan Joudin-an épi nòs Kana-a (cf. LH, antienne du Magnificat des secondes vêpres de l'Épiphanie), l-ap sélébré adorasion Jézu-a, sa « maj-yo » té fè-a, yo-minm ki té soti olévan (Mt 2, 1). Nan « maj » sa-yo ki réprézanté rélijion payin-yo toutalantou yo, Évanjil-la ouè prémis nasion-yo ki résévoua Bòn Nouvèl sovè yo sovè-a palintèmediè Inkarnasion-an. Rivé maj-yo rivé Jérusalèm-nan pou adoré roua Juif-yo (Mt 2, 2) montré yo t-ap chèché nan Israèl, anba limiè mésianik étoual David-la (cf. Nb 24, 17 ; Ap 22, 16), sa-a ki t-apral roua

711-716,
122 nasion-yo (cf. Nb 24, 17-19). Rivé yo rivé-a vlé di payin-yo jouinn Jézu épi yo pap kapab adoré-l kòm Pitit Bondié épi Sovè tè-a si yo pa viré nan diréksion Juif-yo (cf. Jn 4, 22) pou yo résévoua Promès mésianik-la nan min yo jan-l yé nan Ansyin Téstaman-an (cf. Mt 2, 4-6). Épifani-an montré tout nasion-yo antré nan fanmi Patriarch-yo (S. Léon le Grand, serm. 33, 3 : PL 54, 242) épi vîn gin « *dignité ki konfòm ak Israèl-la* » (MR, Vigile Pascale 26 : prière après la troisième lecture).

529 *Prézantasion Jézu nan Tanp-la* (cf. Lc 2, 22-39) montré-l kòm Prémie
583 Pitit ki pou Granmèt-la kòm posésion-l (cf. Ex 13, 12-13). Avèk Siméon
439 épi Àn, sé tout sa Israël t-ap tann-nan ki vîn *rankontré* Sovè-l (sé konsa tradision bizantin-an rélé évenman sa-a). Yo rékonèt Jézu kòm Mési-a yo t-ap tann dépi tèlman lontan, « limiè pou révélation nasion-yo » épi
614 « gloua Israël », min tou « sign kontradiksion ». Soufrans épé-a yo prédi Mari-a, anonsé lèt ofrann-nan, koua-a, k-ap apouin nèt épi san parèy-la, k-ap bay salu-a Bondié « té paré dévan fas tout pèp-yo ».

530 *Chapé al nan Éjip-la* épi masak inosan-yo (cf. Mt 2, 13-18) montré
574 opozision fènoua-yo kont limiè-a : « Li vîn lakay li, moun lakay li pa-t résévoua-l » (Jn 1, 11). Tout lavi Kris-la ap maké ak pèsékision. Moun ki pou li-yo, yo patisipé ladan-l avèk li (cf. Jn 15, 20). Tounin sot Éjip-la (cf. Mt 2, 15) raplé Égzòd-la (cf. Os 11, 1) épi prezanté Jézu kòm libératè définitif-la.

Mistè lavi kaché Jézu-a

531 Pandan pi gran pati lavi-l, Jézu patisipé nan kondision lavi majorité
2427 moun-yo té ginyin : lavi chak jou-a san aparans grandè, lavi ak travay min-yo, lavi rélijyé yon Juif ki soumèt anba Laloua Bondié-a (cf. Ga 4, 4), lavi nan kominoté-a. Pandan tout périòd sa-a, yo révéle nou Jézu té soumèt vizavi paran-l yo épi li « t-ap fè progrè nan sajès ak nan laj ak nan gras dévan Bondié ak lézòm » (Lc 2, 51-52).

532 Obéyisans Jézu aléga Manman-l ak papa légal li-a té akonpli katriyèm
2214-2220 kòmandman-an alapèféksion. Sa-a sé pòtré tanporèl obéyisans li ginyin kòm Pitit aléga Papa-l ki nan sièl-la. Jan Jézu soumèt chak jou bay Jozèf ak Mari-a ap anonsé épi antisipé priyé nan jadin-an : « Sèlman sé pa volonté pa-m... » (Lc 22, 42). Obéyisans Kris-la nan sikonstans kaché lavi chak jou-a té déjà inogiré travay rémété sou pié sa dézobéyisans Adan-an té détrui-a (cf. Rm 5, 19).

533 Lavi kaché Nazarèt-la pèmèt tout moun gin kominion ak Jézu nan
chémin lavi ki pi òdinè-a chak jou :

2717 « Kay Nazarèt-la sé yon ékòl koté nou kòmansé konprann lavi Kris-la : sètadi ékòl Évanjil-la. [...] Sé *silans* réyéلمان yo aprann la toudabò. Nou t-a souété pi gran konsidérasion pou silans-la réviv nan nou, sètadi bèl dispozision éspri sa-a ki nésésè-a [...]. An plis isit la-a nou kapté *yon mòd*

- 2204 *lavi nan fanmi. Sé pou Nazarèt aprann nou kisa fanmi-an yé, ki kalité kominion nan rinmin-an, bèlté-l ki sérié épi sinp, karaktè sakré li ginyin épi yo pa doué dérespékté [...]. Anfin, isit la-a nou konnin aprantisaj travay-la. O ! Nazarèt sa-a, kay Pitit chapantié-a, isit la-a nou t-a souété konprann épi sélébré laloua travay moun-nan ginyin-an ki rèd anpil sé vré min ki sèvi rédanmsion [...]; isit la-a tou nou vlé salué tout travayè sou tè-a épi montré yo gran modèl yo-a, frè yo-a ki Bondié » (Paul VI, discours 5 janvier 1964 à Nazareth).*
- 2427
- 534 *Jouinn yo tounin jouinn Jézu nan Tanp-la (cf. Lc 2, 41-52) sé sèl événman ki kasé silans Évanjil-yo osijè ané kaché Jézu-yo. La-a Jézu pèmèt déviné konsékrasion total li-a pou mision-l nan ki soti nan mistè sa-l yé kòm Pitit Bondié-a : « Èské nou pa-t konnin sé nan afè Papa-m mouin gin pou-m rété ». Mari ak Jozèf « pa-t konprann » paròl sa-a, min yo résévoua-l nan lafoua, épi Mari « t-ap konsèvé tout paròl sa yo nan kè-l », pandan tout déroulman ané-yo koté Jézu té rété kaché nan silans lavi òdinè-a.*
- 583, 2599
- 964

III. Mistè lavi piblik Jézu-a

Batèm Jézu

- 535 *Kòmansman (cf. Lc 3, 23) lavi piblik Jézu-a sé batèm li-an Jan té fè nan Joudin-an (cf. Ac 1, 22). Jan t-ap « préché yon batèm pénitans, pou padon péché-yo » (Lc 3, 3). Yon foul péchè, piblikin épi sòlda (cf. Lc 3, 10-14), Farizyin épi Sadoséyin (cf. Mt 3, 7) épi libètîn (prostitué) (cf. Mt 21, 32) vini pou fè-l batizé yo. « Lè sa-a Jézu vini ». Jan-Batis ézité, Jézu insisté : li résévoua batèm-nan. Lè sa-a Éspri-Sin-an, sou fòm yon kolonb, vîn anlè Jézu, épi yon voua proklamé sot nan sièl-la : « Sa-a sé Pitit mouin-an mouin rinmin-an, nan li mouin jouinn plézi-m » (Mt 3, 13-17). Sé maniféstasion Jézu (« épifani ») kòm Mési Israël-la épi Pitit Bondié.*
- 719-720
- 701
- 438
- 536 *Batèm Jézu-a, sou bò pa-l, sé aksépté épi kòmansé mision-l nan kòm Sèvitè k-ap soufri. Li kité yo konté-l pami péchè-yo (cf. Is 53, 12) ; déjà li sé « Mouton Bondié-a, ki ouété péché tè-a » (Jn 1, 29) ; déjà, li antisipé « batèm » lanmò-l la nan san-an (cf. Mc 10, 38 ; Lc 12, 50). Li déjà vini pou-l « réalizé tout jistis » (Mt 3, 15), sètadi, pou-l soumèt totalman bay volonté Papa-a : paramou li aksépté batèm lanmò sa-a pou padon péché nou-yo (cf. Mt 26, 39). Akséptasion sa-a sé répons li bay voua Papa-a ki mété tout bon plézi-l nan Pitit li-a (cf. Lc 3, 22 ; Is 42, 1). Éspri-a, sa Jézu posédé anplin-an dépi li fòmé nan vant-la, vini pou-l « rété » sou li (Jn 1, 32-33 ; cf. Is 11, 2). Sé Jézu ki pra-l sous Éspri-a pou tout moun. Nan batèm li-an, « sièl-yo louvri pou li » (Mt 3, 16), sa péché Adan-an té fèmin-an ; épi dlo-yo vîn sin antan Jézu ak Éspri-a désann, kòm premié mouvman nouvo kréasion-an.*
- 606
- 1224
- 444
- 727
- 739

537 Palintèmediè Batèm-nan, krétyin-an vîn sanblé sakramantèlman ak
1262 Jézu, li-minm ki antisipé nan batèm li-an Lanmò-l ak Réziréksion-l ;
krétyin-an doué antré nan mistè soumission rabèsman ak pénitans sa-a,
désann nan dlo-a ak Jézu pou-l monté avèk li, épitou fèt yon lòt foua nan
dlo ak Éspri pou-l tounin pitit Papa-a rinmin nan Pitit li-a épi « maché nan
nouvo lavi-a » (Rm 6, 4) :

628 « Poutèt sa, an nou antéré ansanm ak Kris-la palintèmediè Batèm-nan, pou
nou résisité ansanm avèk li ; an nou désann ansanm avèk li, pou, an minm
tan, yo lévé nou anlè ; an nou monté ansanm avèk li, pou, an minm tan tou,
yo ba nou gloua-a » (S. Grégoire de Naz., or. 40, 9 : PG 36, 369B).

Sé konsa sa fèt « pou apati sa-k té réalizé nan Kris-la nou vîn konnin apré
bingn dlo-a, Sint-Éspri-a volé vîn nan nou sot nan pòt sièl-yo, li vidé onksion
gloua sièl-la nan nou, voua Papa-a fè nou tounin pitit adoptif » (S. Hilaire,
Mat. 2 : PL 9, 927).

Tantasion Jézu-yo

538 Évanjil-yo palé osijè yon tan Jézu té pou kont-li nan dézè-a apré Jan
fin batizé-l la : « Éspri-a pousé-l nan dézè-a » épi li rété la karant jou san-l
pa manjé ; li viv ak bèt sovaj-yo épi anj-yo t-ap sèvi-l (cf. Mc 1, 12-13).
394 Alafin tan sa-a, Satan tanté-l toua foua antan-l chèché késioné dispozision
518 li gin kòm pitit aléga Bondié-a. Jézu répousé atak sa-yo ki réprann nan tèt
tantasion Adan nan paradi-a épi Israèl nan dézè-a, épi Djab-la pati sot
koté-l « jous pou tan-an » (Lc 4, 13).

539 Évanjélistis-yo indiké sans kaché évenman salu sa-a. Jézu sé nouvo
397 Adan-an, ki rété fidèl koté premié-a té sikonbé nan tantasion-an. Jézu
akonpli vokasion Israèl-la : kontrèman a sa-yo ki té provoké Bondié
lontan pandan karantan nan dézè-a (cf. Ps 95, 10), Kris-la révéle okontrè
kòm Sèvitè ki obéyi volonté Bondié-a anplin. Nan sa Jézu ranpòté viktoua
sou Djab-la : li « maré moun ki gin fòs-la » épi li raché nan min-l yon lòt
foua sa-l té pran-an (Mc 3, 27). Viktoua Jézu sou Tantatè-a nan dézè-a ap
609 antisipé viktoua nan soufrans-la, obéyisans li-a nan pi ro dégré poutèt
rinmin li ginyin kòm pitit aléga Papa-a.

540 Tantasion Jézu-a manifésté nan ki fason Pitit Bondié-a sé Mési-a,
2119 kontrèman a sa Satan ap propozé-l la épi moun-yo (cf. Mt 16, 21-23)
519, 2849 souété ba li-a. Sé poutèt sa Kris-la ranpòté viktoua sou Tantatè-a *pou*
nou : « Sèké nou pa gin yon prèt an chèf ki pa kapab soufri féblès-nou
1438 avèk nou, yo éséyé-l nan tout bagay minm jan avèk nou, sof péché-a »
(He 4, 15). Chak ané pandan karant jou *Gran Karèm-nan*, l'Égliz-la fè
youn ak mistè Jézu nan dézè-a.

« Péyi-roua Bondié-a proche »

541 « Apré yo fîn rinmèt Jan, Jézu rivé nan Galilé antan l-ap préché bòn
 2816 nouvèl Bondié-a, antan l-ap di : “Tan-an rivé bout, péyi-roua Bondié-a
 763 proche : fè pénitans épi kouè nan Bòn Nouvèl-la” » (Mc 1, 15). « Sé
 669, 768, konsa Kris-la, pou-l akonpli volonté Papa-a, té inogiré Rouayòm sièl-yo
 865 sou tè-a » (LG 3). Min, volonté Papa-a sé « lévé moun-yo anlè pou yo
 patispé nan lavi Bondié-a » (LG 2). Li fè sa antan-l rasanblé moun-yo
 alantou Pitit li-a Jézu-Kri. Rasanbléman sa-a sé l’Égliz-la ki « sémans,
 jèm épi kòmansman » Rouayòm Bondié-a sou tè-a » (LG 5).

542 Kris-la ki nan kè rasanbléman moun-yo nan « fanmi Bondié » sa-a. Li
 2233 konvoké yo alantou-l palintèmediè paròl li-a, palintèmediè sign li-yo ki
 manifesté Rouayòm Bondié-a, palintèmediè mision disip li-yo. Li réalizé
 Avènman Règn li-a prinsipalman palintèmediè gran mistè Pak li-a :
 palintèmediè Lanmò-l sou koua-a épi Réziréksion-l nan : « Mouin minm
 minm, lè y-ap lévé-m sot sou tè-a, m-ap rédi tout bagay vîn jouinn
 mouin » (Jn 12, 32). Yo rélé tout moun pou yo vîn fè youn konsa ak Kris-
 la (cf. LG 3).

Anons Rouayòm Bondié-a

543 *Sé tout moun* yo rélé vîn antré nan Rouayòm-nan. Ringn mésianik sa-
 a, yo anonsé-l toudabò bay pitit Israël-yo (cf. Mt 10, 5-7), li fèt pou nan
 tout nasion moun-yo résévoua-l (cf. Mt 8, 11 ; 28, 19). Pou rivé antré
 764 ladan-l, li nésèsè pou résévoua paròl Jézu-a :

« Yo konparé paròl Granmèt-la réyèlman ak yon sémans yo jété nan yon
 jadin : moun ki tandé-l ak lafoua épi ki antré nan ti bann mouton Kris-la, yo
 résévoua rouayòm-nan ; apré, ak pròp fòs-li, sémans-la jèmin épi grandi jous
 tan rékòlt-la ap rivé (LG 5).

544 Péyi-roua-a sé pou *pòv-yo ak sa-k piti-yo*, sètadi, pou sa-yo ki
 709 résévoua-l ak yon kè rabésé. Yo voyé Jézu « poté bòn nouvèl-la bay pòv-
 2443, 2546 yo » (Lc 4, 18 ; cf. 7, 22). Li déklaré ala kontantman pou yo « paské sé
 pou yo péyi-roua sièl-yo yé » (Mt 5, 3) ; sé « bay ti moun piti-yo » Papa-a
 té aksépté révélé sa-k rété kaché pou savan-yo ak sa-k gin ladrès-yo (cf.
 Mt 11, 25). Jézu patispé nan lavi pòv-yo dépi krèch-la jous sou koua-a ; li
 fè ékspérians grangou (cf. Mc 2, 23-26 ; Mt 21, 18), souaf (cf. Jn 4, 6-7 ;
 19, 28) manké mouayin (cf. Lc 9, 58). Pi plis minm : li idantifié pròp tèt-li
 ak tout kalité pòv-yo épi li fè rinmin aktif aléga yo tounin yon kondision
 pou antré nan Rouayòm li-an (cf. Mt 25, 31-46).

545 Jézu invité *péchè-yo* sou tab Péyi-Roua-a : « Mouin pa vîn rélé moun
 1443, 388, ki kòrèk-yo, min péchè-yo » (Mc 2, 17 ; cf. 1 Tm 1, 15). Li invité yo
 1846 konvèti sinon li pap posib pou yo antré nan Rouayòm-la, min li montré
 1439 yo, ak paròl ak aksion, mizérikind san limit Papa-l la pou yo (cf. Lc 15,
 11-32) épi grandè « kè kontan [ki gin] nan sièl-la pou yon péchè ki fè

pénitans » (Lc 15, 7). L-ap démontré rinmin sa-a nan fason ki pi ro-a ak sakrifis pròp lavi li-a « pou padon péché-yo » (Mt 26, 28).

546 Jézu rélé pou yo antré nan Rouayòm-nan ak *parabòl-yo* ki yon lign
2613 karaktérisistik ansègnman-l nan (cf. Mc 4, 33-34). Palintèmédiè yo, li invité
nan résépsion fèt Rouayòm-nan (cf. Mt 22, 1-14), min li égzijé tou yon
choua radikal : pou rivé gin Rouayòm-nan li nésésè pou bay tout bagay
(cf. Mt 13, 44-45) ; paròl-yo pa asé, sé aksion yo mandé (cf. Mt 21, 28-
32). Parabòl-yo sé tankou yo glas pou moun-nan : èské li résévoua paròl-
la sèlman tankou yon tè di oubyin tankou yon bon tè (cf. Mt 13, 3-9) ?
Kisa-l fè ak talan li résévoua-yo (cf. Mt 25, 14-30) ? Jézu ak prezans
Rouayòm-nan sou tè sa-a sé sékrè ki nan kè parabòl-yo. Li nésésè pou yo
542 antré nan Péyi-Roua-a, sètadi, vîn tounin disip Kris-la pou rivé konnin
« mistè péyi-roua sièl-yo » (Mt 13, 11). Pou moun ki rété « déyò »-yo
(Mc 4, 11), tout bagay rété énigmatik (tankou dévinèt yo pa konprann)
(cf. Mt 13, 10-15).

Sign Rouayòm Bondié-a

547 Paròl Jézu di-yo akonpagné avèk anpil « mèvèy, prodij ak sign » (Ac
670 2, 22) ki montré Rouayòm-nan prézan nan li. Yo témouagné Jézu sé Mési-
439 a yo té anonsé davans-la (cf. Lc 7, 18-23).

548 Sign Jézu fè-yo témouagné sé Papa-a ki voyé-l (cf. Jn 5, 36 ; 10, 25).
156 Yo invité kouè nan li (cf. Jn 10, 38). Moun ki adrésé-l ak lafoua, li ba yo
2616 sa yo mandé-a (cf. Mc 5, 25-34 ; 10, 52 ; etc.). Lè sa-a mirak-yo fòtifé
lafoua nan li-minm k-ap fè travay Papa-l la : yo témouagné li sé Pitit
574 Bondié-a (cf. Jn 10, 31-38). Min yo té kapab okazion « skandal » tou (Mt
11, 6). Intansion sign-yo sé pa pou satisfè kiriozité oubyin anvi maji.
447 Malgré mirak li-yo ki tèlman évidan, gin moun k-ap réjité Jézu (cf. Jn 11,
47-48) ; yo minm akizé-l pou sa, kòm si sé pa pouvoua démon-yo l-ap aji
(cf. Mc 3, 22).

549 Antan-l libéré kèk moun anba sa-k mal sou tè-a : grangou (cf. Jn 6, 5-
1503 15), injistis (cf. Lc 19, 8), maladi ak lanmò (cf. Mt 11, 5), Jézu té réalizé
sign mésianik. Min li pa-t vini pou-l ouété tout mal isit sou tè-a (cf. Lc 12,
13. 14 ; Jn 18, 36), min pou-l libéré moun-nan anba ésklavaj ki pi térib-la,
péché-a (cf. Jn 8, 34-36), k-ap antravé yo nan vokasion yo kòm pitit
440 Bondié épi ki kòz tout sa k-ap fè moun-yo ésklav.

550 Avènman Rouayòm Bondié-a sé déstriksion rouayòm Satan-an (cf. Mt
394 12, 26) : « Min, si sé nan Éspri Bondié mouin chasé démon-yo, donk
1673 péyi-roua Bondié-a rivé sou nou » (Mt 12, 28). *Égzòsism* Jézu fè-yo libéré
moun-yo sot anba dominasion démon-yo (cf. Lc 8, 26-39). Yo antisipé
gran viktoua Jézu sou « chèf tè sa-a » (Jn 12, 31). Sé pa pouvoua koua
Kris-la Rouayòm Bondié-a établi définitivman : « Bondié té kòmandé
440, 2816 kòm roua antan-l sou boua-a » (Hymne "Vexilla Regis").

« Klé Péyi-Roua sièl-yo »

- 551 Dépi kòmansman lavi piblik li-a, Jézu té chouazi douz mesié pou yo té
858 avèk li épi patisipé nan mision-l nan (cf. Mc 3, 13-19) ; Li ba yo pòsion
nan otorité-l la « épi li voyé yo préché péyi-roua Bondié-a, épi géri malad
765 yo » (Lc 9, 2). Yo rété asosié pou tout tan nan Rouayòm Kris-la, paské sé
palintèmediè yo l-ap dirijé l'Égliz-la :
- « Mouin-minm mouin préparé péyi-roua-a pou nou, tankou Papa-m té
préparé-l pou mouin, pou nou manjé, pou nou bouè sou tab mouin nan péyi-
roua-m nan, épi pou nou chita sou trôn-yo, antan n-ap jijé douz fanmi Israèl-
yo » (Lc 22, 29-30).
- 552 Nan group (kolèj) Douz-yo, Simon Piè gin premié plas (cf. Mc 3, 16 ;
880, 153, 9, 2 ; Lc 24, 34 ; 1 Co 15, 5). Jézu konfié-l yon mision li pa bay lòt-yo. Pa
442 pouvoua yon révélasion ki soti nan Papa-a, Piè té déklaré : « Ou sé Kris,
Pitit Bondié vivan-an ». Lè sa-a Granmèt nou-an té déklaré-l : « Ou sé
Piè, sou ròch sa-a m-ap bati Égliz mouin-an, pòt lanfè-yo pap ranpòté
viktoua kont li » (Mt 16, 18). Kris-la, « Ròch vivan-an » (1 P 2, 4), bay
l'Égliz li-a li bati sou Piè-a asirans viktoua sou puisans lanmò-yo. Poutèt
lafoua-a li té déklaré-a, Piè rété kòm blòk-ròch l'Égliz-la ki pap souké. Li
424 té résévoua mision pou-l kinbé lafoua sa-a pou-l pa janm fébli, épi pou-l
konfirmé frè-l yo ladan-l (cf. Lc 22, 32).
- 553 Jézu konfié bay Piè yon otorité spésifik : « M-ap ba-ou klé péyi-roua
381 sièl-yo ; tou sa ou-ap maré sou tè-a, l-ap maré nan sièl-yo, tou sa ou-ap
lagé sou tè-a, l-ap lagé nan sièl-yo tou » (Mt 16, 19). « Pouvoua klé-yo »
dézigné otorité pou gouvèné kay Bondié-a, ki l'Égliz-la. Jézu, « Bon
1445 gadyin-an » (Jn 10, 11) té konfirmé fonksion sa-a apré Réziréksion-l nan :
« Okipé mouton-m yo » (Jn 21, 15-17). Pouvoua pou « maré épi lagé »
vlé di otorité pou padonin péché-yo, pou bay jijman doktrinal épi pran
désizyon disiplin nan l'Égliz-la. Jézu konfié otorité sa-a bay l'Égliz-la
641, 881 palintèmediè ministè Apot-yo (cf. Mt 18, 18) épi patikilièman bay Piè, sé
li minm sèl li konfié klé Rouayòm-nan éksplisitman.

Yon avangou Rouayòm-nan : Transfigirasion-an

- 554 Dépi jou Piè té déklaré Jézu sé Kris-la, Pitit Bondié vivan-an, Mèt-la té
« kòmansé montré disip li-yo li té gin pou-l al Jérusalèm, pou-l soufri
anpil nan min ansyin-yo ak skrib-yo, ak chèf prêt-yo, pou yo touyé-l épi
pou-l résisité sou touazièm jou-a » (Mt 16, 21) : Piè réfizé anons sa-a (cf.
Mt 16, 22-23), lòt-yo pa pi konprann pasé sa (cf. Mt 17, 23 ; Lc 9, 45). Sé
nan kontèks sa-a yo mété évenman sékrè Transfigirasion Jézu-a (cf. Mt
697, 2600 17, 1-8 par. ; 2 P 1, 16-18), sou yon mòn ki ro, dévan toua témouin li té
chouazi : Piè, Jak épi Jan. Figi ak rad Jézu vîn kléré kon limiè. Moyiz ak
Éli parèt antan y-ap palé ak li osijè « dépa-l la, sa-l t-ap réalizé Jérusalèm-
nan » (Lc 9, 31). Yon nuaj kouvri yo épi yon voua sot nan sièl-la di : « Sa-
444 a sé Pitit mouin-an, sa-m rinmin-an : kouté-l » (Lc 9, 35).

555 Pandan yon moman Jézu fè ouè gloua li ginyin kòm Bondié-a, konsa li
 2576, 2583 confirmé sa Piè té déklaré-a. Li montré tou pou-l « antré nan gloua-l la »
 (Lc 24, 26), li doué travèsé palintèmediè koua-a nan Jérusalèm. Moyiz ak
 257 Éli té ouè gloua Bondié sou mòn-nan ; Laloua-a ak Profèt-yo té anonsé
 soufrans Mési-a davans (cf. Lc 24, 27). Soufrans Jézu-a, Papa-a té vlé-l
 vrèman : Pitit-la aji tankou Sèvitè Bondié-a (cf. Is 42, 1). Nuaj-la indiké
 prézans Éspri-Sin-an : « Tout Trinité-a parèt, Papa-a nan voua-a, Pitit-la
 nan moun-nan, Éspri-Sin-an nan nuaj kléré-a » (S. Thomas d’A., s. th. 3,
 45, 4, ad 2) :

« Ou transfiguré sou mòn-nan, épi nan mézi yo té kapab, disip-yo té
 kontanplé gloua-ou la, Kris Bondié, pou lè y-a ouè-ou klouré sou koua-a, yo
 konprann soufrans ou-a sé ou ki vlé-l épi pou yo préché bay tè-a sé ou ki
 réyon klèté Papa-a tout bon » (Liturgie byzantine, Kontakion de la fête de la
 Transfiguration).

556 Nan papòt lavi piblik-la : batèm-nan ; nan papòt Pak-la : Transfigi-
 1003 rasion-an. Palintèmediè batèm Jézu-a « mistè premié nouvo nésans-la té
 déklaré » : Batèm-nou ; Transfigirasion-an « sé sakréman dézièm nouvo
 nésans-la » : pròp réziréksion nou-an (S. Thomas d’A., s. th. 3, 45, 4, ad
 2). Déjà kounié-a nou patisipé nan réziréksion Granmèt-la palintèmediè
 Éspri-Sin-an ki aji nan sakréman Kò Kris-la. Transfigirasion-an ba nou
 yon avangou Avènman Kris-la nan gloua-a « li minm k-ap réfè kò féblès
 nou-an pou-l fè-l sanblé ak kò gloua li-a » (Ph 3, 21). Min li raplé nou tou
 « nou gin pou nou pasé anpil tray pou nou antré nan péyi-roua Bondié-a »
 (Ac 14, 22) :

« Sa-a, Piè po-t ko konprann li, lè-l té anvi viv ak Kris-la sou mòn-nan (cf.
 Lc 9, 33). Li té rézèvé sa pou ou Piè, apré lanmò-a. Kounié-a minm li di :
 Désann travay sou tè-a, sèvi sou tè-a, pou yo méprizé-ou épi klouré-ou sou
 koua sou tè-a. Lavi-a désann, pou yo touyé-l ; pin-an désann, pou-l grangou ;
 chémin-an désann, pou-l bouké sou rout-la ; sous-la désann, pou-l souaf : épi
 ou-minm ou réfizé souffri nan travay ? » (S. Augustin, serm. 78, 6 : PL 38,
 492-493).

Jézu monté Jérusalèm

557 « Lè jou yo té rivé pou yo pran Jézu, li-minm li té maré mîn-li pou-l té
 alé Jérusalèm » (Lc 9, 51 ; cf. Jn 13, 1). Ak désizion sa-a li té vlé di li té
 paré pou-l monté Jérusalèm pou-l al mouri la. Toua foua li té anonsé
 soufrans li-a ak Réziréksion-l nan (cf. Mc 8, 31-33 ; 9, 31-32 ; 10, 32-34).
 Antan-l pran diréksion Jérusalèm, li di : « Sé pa nòmàl pou yon profèt
 péri andéyò Jérusalèm » (Lc 13, 33).

558 Jézu raplé lanmò Profèt-yo yo té touyé Jérusalèm (cf. Mt 23, 37a).
 Poutan li insisté pou-l rélé Jérusalèm vîn rasanblé alantou-l : « Konbyin
 foua mouin té vlé rasanblé pitit ou-yo, minm jan yon poul rasanblé ti
 poulèt li-yo anba zèl. Épi nou pa-t vlé ! » (Mt 23, 37b). Lè-l té ouè

Jérusalèm, li kriyé sou li épi yon lòt foua li ékspriyé sa kè-l anvi : « Si ou té konnin ou minm tou, épi jodi-a minm, sa k-ap ba-ou lapè ! Min koulié-a li kaché pou jé-ou yo » (Lc 19, 41-42).

Antré mésianik Jézu-a nan Jérusalèm

- 559 Kijan Jérusalèm pral résévoua Mési li-a ? Jézu ki té toujou ralé kò-l anba éfò popilè ki t-ap fèt pou fè-l roua (cf. Jn 6, 15), li té chouazi tan-an épi li té préparé détay antré mésianik li-a nan vil « David papa-l la » (Lc 1, 32 ; cf. Mt 21, 1-11). Yo akلامé-l kòm pitit David, kòm sa-a k-ap poté salu-a (*Hosanna* vlé di « sové nou non ! », « ba nou salu-a ! »). Koulié-a minm « Roua gloua-a » (Ps 24, 7-10) « antan-l chita sou yon bourik » (Za 9, 9) li antré nan vil li-a : li pa soumèt Pitit Fi Siyon-an, pòtré l'Égliz li-a, antan-l kòmandé ak riz oubyin violans, min ak umilité ki rann témouagnaj bay vérité-a (cf. Jn 18, 37). Sé poutèt sa, jou sa-a, moun ki té nan Rouayòm li-a sé té ti moun-yo (cf. Mt 21, 15-16 ; Ps 8, 3) épi « pòv Bondié-yo » ki t-ap akلامé-l, minm jan anj-yo té anonsé-l bay gadyin mouton-yo (cf. Lc 19, 38 ; 2, 14). Akلامasion yo-a : « Konpliman pou sa-a k-ap vini o non Granmèt-la » (Ps 118, 26), l'Égliz-la réprann li nan « Sanctus » litiji ékaristi-a pou kòmansé mémorial Pak Granmèt-la.
- 333
1352
- 560 *Antré Jézu antré nan Jérusalèm-nan* manifésté Avènman Rouayòm-nan, sa Roua-Mési-a pral akonpli palintèmediè Pak Lanmò ak Réziréksion-l nan. Litiji l'Égliz-la, antan-l sélébré sa nan Dimanch ramo-yo, ouvri gran Sémèn Sint-la.
- 550, 2816
1169

RÉZIMÉ

- 561 *Antan yo konsidéré sa byin « tout lavi Kris-la parèt kòm yon ansègnman san rété : sètadi silans li-yo, sign-yo, priyé-yo, rinmin pou moun-yo, atansion spésial pou sa-k piti-yo épi pòv-yo, Sakrifis koua-a pou rédanmsion moun-yo li aksépté anplin, anfin Réziréksion-an minm, sé réalizasion paròl li-a épi akonplisman Révélation-l nan » (CT 9).*
- 562 *Disip Kris-la doué konfòmé yo avèk li joutan li-minm li vîn fòmé nan yo (cf. Ga 4, 19). « Sé poutèt sa li pran nou nan mistè lavi-l yo, nou pran minm fòm ak li, nou mouri ak li épi nou résisité ak li, joutan n-a kòmandé kòm roua ansanm avèk li » (LG 7).*
- 563 *Kit sé gadyin mouton kit sé maj, moun-nan pa kapab rivé jouinn Bondié sou tè sa-a, si sé pa antan li ajénou dévan krèch Bétlèèm-nan épi li adoré-l ki kaché nan féblès yon ti bébé.*
- 564 *Palintèmediè soumision-l bay Mari ak Jozèf épitou palintèmediè longè ané li fè ap travay sinpléman nan Nazarèt, Jézu ba nou égzanp viv sin nan lavi fanmi-an chak jou épi nan travay.*

- 565 *Dépi kòmansman lavi piblik li-a apati Batèm li-an, Jézu sé « Sèvitè »-a ki konsakré totalman pou travay Rédanmsion-an ki ankonpli nan « batèm » soufrans li-a.*
- 566 *Tantasion nan dézè-a montré Jézu kòm Mési nan rabésman ki trionfé sou Satan palintèmediè rété li rété kolé totalman sou projè sové Papa-l té vlé sové nou-an.*
- 567 *Kris-la inogiré Rouayòm sièl-yo sou tè-a. « Rouayòm sa-a minm kléré pou moun-yo nan paròl, travay épi prezans Kris-la » (LG 5). L'Égliz-la sé sémans (jèm) épi kòmansman Rouayòm sa-a. Yo rinmèt klé-l yo bay Piè.*
- 568 *Transfigirasion Kris-la gin kòm finalité pou-l fòtifé lafoua Apot-yo parapò a soufrans-la : monté sou yon « mòn ki byin ro »-a ap préparé monté sou Kalvè-a. Kris-la, Tèt l'Égliz-la manifésté sa ki anndan kò li-a épi k-ap réflété nan sakréman-yo : « éspérans gloua-a » (Col 1, 27) (cf. S. Léon le Grand, serm. 51, 3 : PL 54, 310C).*
- 569 *Jézu té monté volontèman Jérusalèm, minm si-l té konnin poutèt kontradiksyon péchè-yo li t-apral mouri la ak yon lanmò violan » (cf. He 12, 3).*
- 570 *Antré Jézu nan Jérusalèm-nan manifésté Avènman Rouayòm-nan, sa Roua-Mési-a, timoun-yo ak pòv nan kè-yo té résévoua nan vil li-a, pral akonpli-a palintèmediè Pak Lanmò ak Réziréksion-l nan.*

[◀Atik
anvan-an](#)

[Gid jénéral-la](#)

[Atik▶
après-a](#)